

筆記小說大觀

集

宋吳曾纂
能改齋漫錄

第七冊

進步書局校印

平定小統
龍
編

龍
政
集
卷
之
一

卷
之
一

能政齋漫錄卷十四

宋 臨川吳曾虎臣纂

記文對附

傀儡起於王家

錢穆父試賢良對策日東坡曉往迓其歸置酒相勞各舉令為文穆父得傀儡除鎮南軍節度使制首句云具官勤勞王家出入幕府東坡見此兩句大加歎賞蓋世以傀儡起於王家也

賦長嘯却胡騎

范蜀公少時與宋子京同賦長嘯却胡騎蜀公先成破題云制動以靜善勝不爭景文見之於是不復出其所作潛於袖中毀之因謂蜀公曰公賦甚善更當添以二者字蜀公從其說故謂之制動者以靜善勝者不爭然景文賦雖不逮於蜀公然他人亦不能到破題云月滿邊塞人登戍樓真奇語也

邵康節贊王通

司馬文正示康節以王通傳康節贊之曰小人無是當世已棄君子有非萬世猶譏

錄其所是。棄其所非。君子有歸。因其所非。棄其所是。君子幾希。惜哉仲淹。壽不永乎。非其廢是。瑕不掩瑜。雖未至聖。其聖人之徒歟。

馮丞相用李泰伯語

李泰伯潛書。其一曰。孔子之言滿天下。孔子之道未嘗行。蓋蓋牲帛。廟以王禮。食其死。不食其生。師其言。不師其道。得其言者為富貴。得其道者為餓夫。馮當世丞相有答伯庸詩云。孔子之文滿天下。孔子之道滿天下。得其文者公卿徒。得其道者為餓夫。馮用泰伯語也。

呂與叔克已銘

呂大臨與叔微仲。丞相弟也。為克已復禮銘曰。凡厥有生。均氣同體。胡為不仁。我則有已。立已與物。私為町畦。勝心內發。擾擾不齊。大人存誠。心見帝則。初無吝驕。作我蟲賊。志以為帥。氣為卒徒。奉辭於天。孰敢侮予。且戰且來。勝私窒欲。昔為寇讐。今則臣僕。方其未克。窒我室廬。婦姑勃蹊。安取厥餘。亦既克之。皇皇四達。洞然八荒。皆在我闥。孰曰天下。不歸我仁。疴痒疾痛。舉切其身。一日至之。莫非吾事。顏何人哉。希之則是。

鄧安惠表啟

鄧安惠自翰苑出守成都。謝表云。捫參歷井。方知蜀道之難。就日望雲。已覺長安之遠。用李太白語。又嘗有啟云。三山已到。輒為風引而還。九闕神遊。不覺夢驚而失。前輩文采風流。醞藉如此。

高麗至豫章先狀

宗寧中。高麗自明州海道入貢。偶乘風自江路至豫章。其先狀云。泛槎馭以尋河。遠朝天關。望桃源而迷路。誤入仙鄉。自驚漂泊之餘。獲奉笑談之雅。

任忠厚投時相啟

任敦夫忠厚。元祐紹聖間。有聲太學。後坐上書入籍。留洛不調者久之。有投時相啟云。籠中翦羽。仰看百鳥之翔。岸側沉舟。坐閱千帆之過。

蘇景謨詩啟

衣冠晨集烏衣巷。旌旆春生綠野堂。蘇景謨詩也。又有啟云。珠璧之投甚暗。詎免驚疑。農馬之志非專。誤勞訪問。

黃公孝師右軍筆法

仁宗時太常博士黃公孝先有詩名尤工字學常師右軍筆法深得其妙每曰學書當先務真楷端正勻停而後饒得破體破體而後饒得顛草凡字之為體緩不如緊潤不如密斜不如正濁不如清右欲重左欲輕考之古人蹤跡其言不妄也

東坡銘李伯時玉池

東坡有李伯時洗玉池銘始予讀之皆不得其說其後得伯時石刻序跋乃能明其意蓋元祐八年伯時仕京師居紅橋子弟得陳峽州馬臺石愛而致之齋中一日東坡過而謂曰斲石為沼當以所藏玉時出而浴之且刻其形於四旁予為子銘其唇而號曰洗玉池而所謂玉者凡一十六雙琥璆山三鹿盧帶鈎臻玳瑁琢杯水蒼佩螳螂鈎佩柄瑯瑤拱璧是也伯時既下世池亦湮晦徽宗嘗即其家訪之得於積壤中其子碩以時禁蘇文因潛磨去銘文以授使者於是包以裊褥棲以髹匣昇至京師置之宣和殿十六玉唯鹿盧環從葬龍眠餘者咸歸內府矣東坡銘刻與伯時序跋昔有而今亡而池亦歸天上惜其本末不著後世將有讀坡銘而不能曉者因其於此陳峽州即陳彥默字子真自號懶散云

武后製賜狄仁傑袍金字

新唐書狄仁傑傳載仁傑轉幽州都督賜紫袍龜帶后自製金字十二於袍以旌其忠其十二字史不著予按家傳云以金字環繞五色雙鸞其文曰敷政術守清勤昇顯位勵相臣乃命錄之新史不惟不著十二字雖五色雙鸞亦不錄也家傳云長親有白鳥連理枝繞於墓側新史止云有白鵲馴擾之祥

曲如鉤例封侯

崔善為左丞令史惡其聰察以其身佞而僂嘲之曰崔子曲如鉤隨例得封侯膊上全無項胸前別有頭新唐史止云曲如鉤例封侯而已

舉酒行令

陶穀使越錢王奉之甚渥因舉酒行令曰白玉石碧波亭上迎仙客陶應聲曰口耳玉聖明天子要錢塘

恩袍色動仙籍香浮

仁宗賜進士及第詩云恩袍草色動仙籍桂香浮黃冕仲謝及第啟全用以為一聯云恩袍色動迷芳草之依依仙籍香浮惹春風之拂拂東坡戲之曰好作聞喜燕酸文

浯溪銘

湖南浯溪在永州北二百餘里。流入湘江。其溪水石奇絕。唐上元中。邕管經畧使元結罷任居焉。以其所著中興頌刻之崖石。撫州刺史顏真卿書。結復為浯溪石堂西峰四獻亭。銘皆刻於崖石上。本朝乾德中。左補闕王仲來知永州。維舟於此。留詩。元公序云。浯溪在湘水之南。北匯於湘。愛其奇異。遂家溪畔。溪世無名稱者也。為愛之故。命曰浯溪。銘於溪口。銘曰。湘水一曲。淵洄倚山。山開石門。溪流潺潺。山開如何。巉巖雙石。臨彼淵岸。夾溪絕壁。水實尤怪。石又尤異。吾欲求退。將老茲地。溪古地荒。蕪沒已久。命曰浯溪。旌吾獨有。人誰遊之。銘在溪口。王仲詩云。湘川佳致有浯溪。元結雄文向此題。想得後人難以繼。高名長與白雲齊。

包孝肅家訓

包孝肅公家訓云。後世子孫仕宦有犯贓濫者。不得放歸本家。亡沒之後。不得塋於大塋之中。不從吾志。非吾子孫共三十七字。其下押字。又云。仰珙刊石。監於堂屋東壁。以詔後世。又十四字。珙者。孝肅之子也。

何丞相賀巡幸還京表

靖康元年。徽宗巡幸淮泗。將還京闕。禮部郎中劉觀代宰臣賀表云。漢室太公。本是

蓬蒿之叟。唐朝肅帝。殊非揖遜之人。何丞相文縝以其語太朴。因改云。擁簪迎門。陋未央之末禮。御鞍馳道。笑至德之末情。

仕有五瘴說

龍圖梅公摯。景祐初。以殿中丞謫知昭州。嘗有瘴說云。仕有五瘴。急催暴斂。剝下奉上。此租賦之瘴也。深文以逞良惡。不白。此刑獄之瘴也。皆晨酣宴。弛廢王事。此飲食之瘴也。侵牟民利。以實私儲。此貨財之瘴也。盛陳姬妾。以娛聲色。此帷薄之瘴也。有一於此。民怨神怒。安者必疾。疾者必殞。雖在穀下。亦不可免。何但遠方而已。仕者或不自知。乃歸咎於土瘴。不亦繆乎。其後鄒道鄉志完。元符中。謫昭州。因其說。以為詩曰。五瘴作時雖不染。一篇留誠指其然。謂是也。徐師川建炎避地至昭州。感二公遺跡。作詩云。正言鄒子獨留名。法從梅公尚。有亭樂是苦。言能治瘴。竹生屈曲。坐看經風前。雲似秋前赤。雨後山能曉。後青。戀土懷鄉。頻作惡。懷賢感舊。數飄零。竹生屈曲。坐看經者。蓋道鄉昔寓居閣上。忽於佛前地生五筍。甚可愛。地主云。閣成今十年。隱築堅實。溝塹深潤。未嘗有此。州人傳之。咸謂吉祥。以為為道鄉發也。道鄉因詩云。基創於今正十年。不容山竹暗行鞭。森然五筍自何出。盛矣一邦相與傳。

王履道詩文彙

黃季岑云。王履道詩。直須刺著天公眼。便遣雷霆下取將。是能讀倚相三墳五典之書。且盡識建章十門萬戶之制。又順斗布合宮之政。分方調文鼎之神。金篆浮波河。伯順流而聽命。瓊科宣錄清華正畫。以臨壇。又鳳鞋微露綉幫相。皆其筆墨也。

追贈陳瑩中葛魯卿文

譚彥成追贈陳瑩中云。汲黯何為坐息淮南之變。鄭公若在。必輟遼東之行。葛魯卿云。夷考平日。素絲之節。無聞坐廢累年。白首之言。猶在吳正仲別何文縝。但云切須念第一。莫打罵長行。

大遼使謝賜柑表

宗寧三年。大遼賀生辰使至。賜宴。且賜柑。有謝表云。聘禮適陳。祝帝齡於紫闕。恩華固異。賜仙實於公郵。方厥包來貢之期。捧茲德維馨之賜。天香滿袖。染湘水之清霜。雲液盈盤。挹洞庭之餘潤。梓里豈遑於遺母。楓朝切願於獻君。感德滋深。諭言罔既。

胡少伋夢書八句頌

胡少伋。夜夢遊一寺。與勒和尚衲僧五六人。共步長廊。少伋手持長鏡。劃青方石。如

雖畫沙書六句頌云。我行世間多動少息。暫休寶坊。萬慮人寂。明日出山。八面受敵。勒和尚隨句微哦。旁皆歎息。中有一僧云。萬慮人寂。句法甚勝。明日出山。是將動耶。似覺復寐。自理前頌。增住為主人。動轉為客。兩語於出山句上。廣為八句。

東坡四言

吟哦傲兀。仰瞻岩月。遇巖迎崖。銀釭玉齒。龜鼉吟喁。雁鶩噪坻。卧玩我語。聳牙岷嶺。右江行見月四言也。江郊葱瓏。雲水蒨絢。碕岸斗入。洄潭輪轉。先生悅之。布席開宴。初日下照。潛鱗俯見。意釣忘魚。樂此竿綫。優哉游哉。玩物之變。右江郊四言也。皆東坡作。

東坡戲書

葑草尚能欄浪。藕絲不解留連。此一聯。東坡在黃時戲書也。又云。湖上秋風聚螢苑。門前春浪散花洲。王文甫所居在黃之車湖。即武子故居。宅枕大江。即散花洲也。東坡屢過其家。戲書此。

選官改定方澤儀安等曲

宣和四年。校書郎韓迪撰方澤儀安之曲。著作佐郎吳次賓撰社稷安寧之曲。校書

郎艾晟撰感生帝大安之曲。校書郎趙永喬撰帝景安之曲。正字李舜由撰充國公成安之曲。臣寮上言曰。謹按爾雅曰。卉者。蓋總草之名也。今方澤儀安之曲。乃曰蔽帝之棠。合并為一。遐方來歸。茲卉是式。然則謂木為卉。可乎。詩曰。為絺為綌。蓋精者為絺。粗者為綌。今社稷安寧之曲。乃曰求福生民。表功社稷。曰舞以帔。曰冕以綌。然則古有絺冕也。若以為綌也。則字為失律矣。感生帝之詩。有曰為赤燿怒者。帝神名也。祭之輒斥其名。何邪。帝籥之詩。有曰祀彼顯相者。羣臣相其祀事也。謂之祀彼顯相者。又何人耶。甚者樂不用中聲久矣。而其詩猶曰。於論中聲。豈不悖乎。奉聖旨。令尚書省。措置選官。改定元撰。方澤儀安等曲。官除趙永喬已罷館職外。餘並送吏部。與合入差遣。其後艾晟進狀辨正。係道經靈寶經云。南方赤靈帝君。名同浮極炎。字赤燿怒。唐開元禮。立夏祀赤帝。祝文。敢昭告於赤帝。赤燿怒等。事奉聖旨。前降。送吏部指揮與改正。別與差遣。

胡舜陟非顏岐撰制辭

靖康元年四月。顏岐賜出身。除中書舍人。殿中侍御史胡舜陟指岐非云。其草鬼說之中書舍人辭云。知世掌美。又潤色於絲綸。用杜甫詩。欲知世掌絲綸美之句。今日

知世掌美。成何等語耶。除孫傳侍讀云。朕念元子。出就外傳。從學之始。左右前後羽翼既多。宜得知孔氏正道者。以表率之。此東宮辭也。傳已罷東宮官矣。勸讀而為此語。豈非昏繆之甚。郡守承流宣化也。懷安霍安國再任。乃云宣流河內。張良運籌帷幄之中。決勝千里之外。除錢伯言知真定。乃云增籌幄之勝。至若除程瑀正言。曰。送慶使金。士望甚休。許景衡兼太子諭德。曰。日靜身安。李旦除屯田員外郎。曰。稍還應宿之郎。增耀起工之部。王雲出守。曰。昔自瑣闥之拜。肅持金國之書。其辭不與如此。奉聖旨。岐罷中書舍人。

劾張文潛謝表不欽

張文潛崇寧元年。復直龍圖閣。知潁州。謝表云。我來自東。每兢兢而就列。炊未及熟。又挈挈以告行。臣僚上言云。我來自東。是為不欽。豈有君父之前。輒自稱我。雖至親不嫌於無欽。有時而爾汝。然非謝表所可稱之辭。雖數更赦宥。不可追咎。亦不可不禁。如今後有犯者。仰御史臺。即時彈劾。

奪范純仁謚忠宣議

崇寧二年。六月。臣寮上言。范純仁謚曰忠宣。其謚誥去年已追奪。并元定議覆議官各

銅十斤。今節錄謚議如後。考功員外郎鄧忠臣議有曰。每思捐身而獻策。常願休兵而息民。祇知扶危而定傾。寧恤跋前而疐後。又曰。方讒言亂國。而明蔡確之無實。洎奸黨投石。而謂大防之可原。衆人莫敢言之。時在偏州。無可用之地。義形正色。憤激至誠。非特救當世。正人端士之網羅。直欲戒後世。亂臣賊子之迷罔。狗公忘己。爲國惜賢。又曰。父母之國。有時而去。股肱之義。於是或虧。放之江湖。忽如草芥。紹蘭澤畔。更甚屈原之悲。占鵲坐隅。已分賈生之死。又曰。側席南望。而挾浮雲之蔽。趣節東歸。而詠零雨之濛。又曰。法座想見其風采。詔書相望於道途。奉聖旨。權發遣汝州鄧忠臣差管幹南京鴻慶宮。

翟公巽作文艱得

葉少蘊云。翟公巽作文艱得。然得必奇也。在西掖時。以草詞遲。罰銅崇寧間。余同在試院。逼晚商量作策題。以冗官爲問。及曉問之云。一夜僅成四句云。太平日久人樂仕。進可爲朝廷慶者一。可爲有司慮者二。雖止四句。然實佳作也。

林希草陸農師曾子開被謫辭

紹聖初。陸農師。曾子開俱以曾預修神宗實錄被謫。中書舍人林希子中草詞云。謂

爾同為謗訕。則於今具藁不存。謂爾有所建明。則未嘗爭論而去。人以為得實。

賈文元公戒子孫文

賈文元公戒子孫文云。古人重厚樸直。乃能立功立事。享悠久之福。又士人所貴。節行為大。軒冕失之。有時而復來。節行失之。終身不可得矣。縉紳以為格言。

答劉保衡投進古器詔

大中祥符五年。南康軍建昌縣李士衡莊。遇晦冥。即光彩出沒。一夜雷電風雨暴作。翌旦山坼泉湧。急流中得一古器。篆文款識甚奇。太守劉保衡指以為鼎。投進。答詔云。眷彼名區。出茲古器。既瑰奇而有異。爰貢奉以斯來。省閱之餘。嘉尚良切。保衡繪形刊石。尚在今觀。石刻制作精巧。正古酒爵。非鼎也。當失於稽考。故詔書亦但言古器云。

歐陽公投胥內翰啟

歐陽文忠少時。猶未知名。以文編投內翰胥公偃。且有長牋。所謂在昔築黃金之館。首北路以爭趨。是也。集嘗載之。今不錄。胥公有啟。謝歐陽秀才云。伏蒙眷私。以盛製文筆二編。先之長牋。為贄者。恭以某人象輿異稟。龍輔至珍。奉奕世之詒謀。克隆堂

室傾群言之妙旨。深達淵源。服膺聖域。以惟勤躡足。俊躔而迥異。敏學該乎變貫。英識極於覃研。秉節高奇。發清吟於梁甫。締交名勝。綴雅聚於蘭臺。飄飄之逸思。無窮藉藉之芳塵。自遠偶衄。一飛之翼。行躋多士之魁。何誤采於虛聲。辱遠垂於厚顧。方披睥表。遽捧雄編。恣探賞以忘勞。信窺測而靡暇。幽意絢於道德。高義薄於雲天。飛染道麗以盈箱。雕績紛華而滿眼。賞孫詩之零雨。何止一章。贊沈賦之曜日。豈惟數句。固將備西崑之王府。奚獨易東堂之桂枝。允矣難能。誠哉可貴。雖亨衢自致。靡資左右之先容。而名路共成。敢惜齒牙之餘論。歐公得之。又為長牋以謝之。不載諸集。今錄於此。云。右某啟。昨贊蕪音。仰塵紉几。載形答復。深極褒稱。弊帚無容。愧藏家而自享。重言外獎。干尺牘以必珍。始繩穿而匣開。爛然在目。旋骨驚而心折。至矣聞音。退按頑跡。陰加震疊。竊以昔者魯哀垂乎一字。寵極於華章。汝月更乎坐評。自成於往法。得河南之口占。多藏奔以為榮。獲江左之筆蹤。則神明之來復。至有不喜人事。常堆案而弗酬。靡答私書。或矜才而格物。未若翠綏鳴玉之彥。蘭臺金馬之英。品風流坐正物之源。交士林忘公侯之貴。俯存寒素之目。毋密警效之音。虎墨流英。洒鴻都百金之筆。犀談對客。發荊州一識之函。有煥私藏。因為殊遇。某倥蒙惟舊。檢操弗支。

乏沃若之軒髦。有尾兮之長醜。顧右臂而為彈。早歎蕭疲。雖左肘之生楊。徒能彈化。爰以自童髮之交。翦浴聖日之光華。勉紹箕裘。懼隳門素。冠乎拔木。莫踐化人之場。鈍若神鎚。爰對囊錐之穎。一昨與偕外計。續食縣官之郵。再詣中臺。果玷浮華之目。州閭貶於素論。篋衍棄於祭芻。委末路而弗振。與清淪而自隔。然或鼓舞至化。呻吟變儒。効騷人之鬱抑。慕漳濱之模楷。品之上下。曾弗齒於鍾評。擲中宮商。宜遠慙於孫賦。奚辨麗而可紀。徒飢散以興譏。何弗避於詆訶。輒外彰於嗤笑。雖蹢躅短韻。殆無取於繫轅。盧胡見貽。乃自珍於乾璞。所期用覆瓿。譬十年之練都。投置皮箱。資一笑於相樂。伏蒙某官憫屯愚之無似。加品目之惟優。醜以愛忘。音緣賞奏。許上修名之謁。獲伸拜德之恭。後堂執經。飫陪一肉之賜。西齋宴坐。密親三雅之歡。執如意以指揮。務車轂而推引。噴咳珠玉。大小以之成珍。指顧飛沈。盼睠於焉起色。出乎望表。溢乃情涯。而復俾十倍而增榮。示一嘆而為美。當黯闇之多暇。枉虞筆以攝文。緡旨星稠。劈戔雲落。布帛之言甚暖。暴以秋陽。齒牙之論所加。重於大呂。譬以明月。暗投於人。不意此音。猥來入耳。謹當納藏。行楮歸耀。當閭襲以十綈。為天下之至寶。脫復一續。解體中之不安。貴洛紙而聲傳。與吳刀而共布。隱恩所及。頂踵奚勝。